

referimus, non autem ad tertiam, quia cogitationis ille actus non accidentaliter, sed essentialiter animam perficit. Quatenus verò eadem anima nostra accidentalibus cogitandi modis ulterius perficitur, nihil obstat, quò minus tertia etiam significatione vivere dicatur, sicuti colligitur è superioribus.

## EXERCITIO LV.

*Ex corporis corruptione animæ interitum non sequi.*

1. **P**ostquam sic Animæ humanæ sive Mentis immortalitas seu perpetua vita demonstrata fuit, sive vitam primo (quod rarum esse fateor) sive secundo, sive tertio modo (qui ambo satis sunt usitati) capiamus, superest uti causas præcipuas indicemus, ob quas vera animæ immortalitas non potuerit clarè satis agnosci à pluribus, illis enim refutatis hæc firmiùs adhuc stabilita erit, evidentiusque ab ipsa anima percipietur.

2. Et tres quidem causas potissimas invenio, quarum prima est, quòd corpus humanum intereat, cui corpori cum anima nostra tam arctè juncta sit, ut famem, sitim,